


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-49	Al-Hujuraat	18	2	Madaniyyah	Ke-106	5



Zaman Diturunkan

Surah al-Hujuraat adalah satu Surah Madaniyyah, ia diturunkan selepas pembukaan Mekah sekitar tahun ke-9 Hijrah yang merupakan عام الوفود iaitu tahun di mana Rasulullah s.a.w. banyak dikunjungi oleh rombongan-rombongan dari luar Madinah.

Perkaitan Surah Al-Hujurat Dengan Surah Sebelum Dan Selepasnya

Di dalam Surah al-Fath sebelum ini telahpun diberikan berita gembira kepada umat Islam bahawa mereka akan mendapat banyak kemenangan dan harta ghanimah, orang-orang munafiq pula dinasihati supaya mengikhlaskan amalan mereka. Di dalam Surah al-Hujuraat ini pula dikatakan mengikhlaskan amalan bererti meninggalkan sifat nifaq, tidak mendahului Allah dan Rasul atau Kitab dan Sunnah, menjaga hak-hak Allah, menjaga hak-hak Rasulullah dan menjaga hak-hak sesama Islam di samping mempunyai akhlak-akhlak mulia.

Beberapa Kata Kunci Dan Tema Utama Surah

1. Di dalam surah ini orang-orang Islam yang mentah dan orang-orang munafiq diseru sebanyak 5 kali dengan lafaz يٰٓأَيُّهَا الَّذِينَ آمَنُوا (Ayat: 1, 2, 6, 11 dan 12). Penggunaan seruan seperti itu bertujuan menampakkan kepada mereka bahawa perisytiharan dengan lidah dan pengakuan sebagai Islam mereka pada zahirnya tidak bersesuaian dengan tuntutan iman.

2. Orang-orang Islam dinasihati supaya tidak terus menerima berita daripada orang fasiq, mereka sebaliknya mesti menyelidik terlebih dahulu dan tidak bertindak secara gopoh berdasarkan cerita orang fasiq, mereka dinasihati supaya menyelidik dan memeriksa terlebih dahulu segala cerita yang sampai kepada mereka supaya tidak menyesal kemudian (Ayat: 6).

إِن جَاءَكُمْ فَاسِقٌ بِنَبَأٍ فَتَبَيَّنُوا

3. Firman Allah إِنَّمَا الْمُؤْمِنُونَ إِخْوَةٌ yang terdapat di dalam surah ini menjelaskan kepada umat Islam tentang persaudaraan sejagat mereka. Persaudaraan Islam tidak berasaskan warna kulit, keturunan, keluarga dan negara malah ia terjalin hasil daripada beriman kepada Allah dan Rasul terakhir daripada Allah (Ayat: 10).

إِنَّمَا الْمُؤْمِنُونَ إِخْوَةٌ فَأَصْلِحُوا بَيْنَ أَخَوَيْكُمْ وَأَتَّقُوا اللَّهَ لَعَلَّكُمْ تُرْحَمُونَ ﴿١٠﴾

4. Orang-orang Islam dilarang mengumpat sesama Islam, mendedahkan ke'aiban mereka kepada orang lain, memandikan dan mengkafankan orang-orang Islam yang mati disamping menyembahyangkan jenazah mereka, memohon ampun untuk mereka, mereka diminta menyegerakan pengebumian orang mati supaya tidak tersebar bau yang busuk dan macam-macam penyakit yang lain. Orang-orang Islam

diminta supaya memperbaiki hubungan sesama mereka, bukan mencela dan memburukkan satu sama lain, mereka seharusnya berdoa kepada sesama saudara mereka. Di dalam surah ini perbuatan mengumpat diibaratkan dengan memakan daging saudara yang telah mati, tujuannya ialah supaya umat Islam mengelak diri daripada perbuatan keji itu (Ayat: 12).

وَلَا يَغْتَبِ بَعْضُكُم بَعْضًا أَيُحِبُّ أَحَدُكُمْ أَنْ يَأْكُلَ لَحْمَ أَخِيهِ مَيْتًا فَكَرِهْتُمُوهُ

5. Firman Allah إِنَّ أَكْرَمَكُمْ عِنْدَ اللَّهِ أَتَقْوَاهُ menjelaskan bahawa orang yang mulia dan terhormat di sisi Allah ialah orang yang lebih ketakwaannya iaitu orang yang tidak menghampiri perkara-perkara yang diharamkan Allah (Ayat: 13).

إِنَّ أَكْرَمَكُمْ عِنْدَ اللَّهِ أَتَقْوَاهُ

6. 5 sifat orang-orang mu'min yang sebenar disebutkan di dalam surah ini. Orang-orang mu'min yang sebenar ialah yang percaya kepada Allah, percaya kepada Rasulullah dan mereka yakin penuh dengan agama Allah selain itu mereka sanggup mengorbankan harta benda dan nyawa di jalan Allah (Ayat: 15).

إِنَّمَا الْمُؤْمِنُونَ الَّذِينَ ءَامَنُوا بِاللَّهِ وَرَسُولِهِ ثُمَّ لَمْ يَرْتَابُوا وَجَاهَدُوا بِأَمْوَالِهِمْ وَأَنْفُسِهِمْ فِي سَبِيلِ اللَّهِ